

Awe ta celebra fiesta di San Juan, fiesta di Dera Gay

ORANJESTAD – Pa añanan largo ta celebra dia 24 di juni e fiesta di San Juan esta Dera Gay. E fiesta aki ta un di nos herencia cultural y ta importante pa wordo celebra y pasa pa otro generacion cu ta sigui.

Manera un tradicion, e comunidad Arubano y e demas habitantenan di oro paisnan cu ta residencia riba nos dushi isla ta celebra Dia di San Juan, cu canto, baile, manifestacionnan cultural na diferente centronan di bario.

E origen y desaroyo di e fiesta di San Juan ta un fiesta cu a wordo importa di Centro y Sur America, pero ta wordo celebra na un forma unico na nos isla. Nos hendenan grandi ta conta cu den pasado na nos isla e cunukeronan tabata warda tur e tronconnan di nan cosecha anterior, manera palo di maishi, rama y otro tipo di palo, pa kima nan riba dia di San Juan. E tradicion di antes tabata cu nan tabata cuminsa cende candelanan grandi bispo di San Juan, esta dia 23 di juni. E kimamento mes tabata simbolisa purificacion, core cu tur mala suerte y pa por tin un miho cosecha.

Celebra y historia

Tur pais cu ta celebra e Fiesta di San Juan ta haci esaki na diferente manera. Pero Aruba su estilo di celebra e Fiesta di San Juan ta unico y diferente. Riba e dia aki por mira con hopi hende ta bisti den T-shirt of blusa tradicional cu ta colorman cora cu geel y carson preto, cual ta representa e candela. Segun historia e celebracion ta origina di e combinacion di pre Arawak Cristian fiesta di cosecha y e trabou di e misioneronan Spaño. Aruba ta e unico pais cu ta celebra e dia cu baile y canto.

Dera un gay

Na fiesta di San Juan mes tabatin cierto weganen manera bulamento di candela, bailamento, cantamento, contamento di storia, leyenda y chasco, tur esaki tabata sosode rond di e candela. Fiesta di San Juan tabata algo grandi na Aruba. Mayoria di e pueblo no tabata traha riba dia di fiesta di San Juan. Den e oranan di atardi na momento cu cuminsa bira un poco scur, e fiesta tabata cuminsa. E tradicion di dera un gay bibo tabata algo comun den e epoca di antaño. Awendia dera un gay bibo no ta permiti mas. Den tur bario tabatin e fiesta aki. Hendenan homber

tabata baila cu lenso mara dilanti nan wowonan y ta purba dal e ki. Prome cu e cuminsa baila y busca manera di dal e gay, un persona ta draai e algun biaha rond, te ora e perde sentido di direccion. Despues e ta haya un palo di bati maishi den su man, cu cual e mester mata e gay.

Bailadonan y musico

Bailadonan di experiencia tabata sigui e biento pa nan sa unda mas o menos nan ta para. Tambe e bailadonan ta schuif nan pia abou na suela buscando e gay, pasobra no mag di fula e tera cu e palo. E custumber ta cu cada bailado por purba tres biaha pa dal e gay. Si tres biaha e faya, ta bin otro bailado pa purba. Riba e dia aki e mucha muhenan ta bisti un strik geel den nan cabey y nan saya ta largo y color geel. E musiconan tambe tabata bisti un banchi geel of cora. E grupo musical tabata consisti di un of mas fio, tambor of tambu, wicharo of wiri y di un cantante. Un cachete di burico tabata wordo uza na algun caminda na luga di maraca. Un cantante tabata canta, mientras cu otro nan tabata canta e refran. Segun e bailado ta purba di dal e gay cu ta dera den tera (awor nan ta uza un calbas seco), e musica ta res-

ona y cada bes cu e hera e gay ta hopi harimento y diberticion tin.

Aruba di antes compara cu awendia

Pa bay bek un tiki den historia, esaki ta indica cu den siglo 19 Aruba a cuminsa celebra San Juan/Dera Gay. E aña ey hopi biaha e hendenan tabata cende candela dia 23 di juni. Nan tabata bisa cu e resto di cosecha nan tabata pone hunto cu algun cos rond di cas, y nan tabata cende na candela. Aruba no tabata pobla e tempo ey compara cu awo. Si cende candela, no tabata un molester pa ningun hende pasobra e casnan tabata leu for di otro. Pero compara cu awendia esaki ta otro mirando cu hendenan ta keha di e huma ya cu e casnan ta cerca di otro. Den e añanan cu a sigui, a cambia e fecha pa dia 24 di juni. Brandweer su avisonan cu tabata ta drenta

ta hopi di candela cu ta bira asina grandi. Locual cu nan ta bisa antes, e resto di cosecha, no ta esey mas.

Pero e tradicional cendemento di sushi na candela tambe ta un tradicion pa hopi aña, caminda Cuerpo di Bombero tabata tin nan mannan yen cu trabou, bayendo di skina pa skina riba nos isla pa paga e candelanan cu dado momento a cuminsa bira in-controlabel.

Cende candela

E cunukeronan tabata piki tur resto di mata di cosecha y pone esaki hunto. Nan tabata cende esaki na candela di cual nan tabata purifica e cosecha nobo. Tambe nan tabata drecha e tera pa asina prepara pa planta. Antes nan tabata cende mata di bonchi of otro nan di cosecha, pero awendia esaki no ta pasa. Awendia tin hende ta hasta cende taira na candela, pero hopi hende ta haci uzo di e oportunidad aki pa kima sushi. □